

بِسْمِ اللَّهِ الرَّحْمَنِ الرَّحِيمِ



## *Khutba Jummah*

*Hazrat Khalifatullah Muir. A. Azim (atba)*

17 Avril 2020

23 Shabaan 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### *Bane Attributs d'Allah (Pt.5)*

Par la grâce d'Allah mo pé continuer mo 5<sup>ème</sup> partie Khutba Jummah lors bane attributs d'Allah.

Donc, Allah pé dire nous ki c'est Li ki suprême lors So bane *banda*. Li ena contrôle et pouvoir absolu. Li ena pouvoir pou détruire tout, li ena pouvoir pou puni. C'est Li ki donne la mort et c'est Li ki donne la vie. Et c'est Li-même ki fine faire bane arrangement pou ou bane protections de sorte ki ou même ou pas alle détruire ou par ou-même face à So décret. Et c'est sa même sujet ki le Quran mentionner dans bane les autres places, ki ou fine faire tellement bane péchés ; tellement bane péchés ki li ti pou correcte, li ti pou dans tout So droit pou élimine ou nette et pas seulement ou, même bane les autres ki possède la vie tout.

Dans ene lotte place dans Quran fine mentionne sa sujet là comme suite ki pou chaque dimoune, kan même li apparent ou soi caché, kan même li sorti le soir ou li zour, Allah fine faire mette bane surveillants lors li ki protège li. De ki bane zaffaires pé protège li? Pé protège li de bane décrets d'Allah même.

Donc ici ki sujet li pé traiter? En fait c'est le décret divine même ki donne la vie et c'est le décret divine même ki donne la mort. Personne péna sa capacité pou mort là sans le décret divine. Donc si le décret d'Allah pé appelle ou vers la mort, bé Allah dire ki c'est nous *Taqdir* (décret) même ki fine protège zot pou ene certaine les temps et fine protège zot contre Mo lotte décret. Sinon Allah Li complètement suprême. Li ena tellement de puissance et capacité ki Li capave élimine tout et détruire tout, mais en fait c'est So *Taqdir* même ki pé protège ou de So bane les autres *Taqdir*.

Dans ene lotte verset, Allah fine faire sa bien claire ki So *Taqdir* continuer protège ou tanque ki So *Taqdir* de la mort pas vini. Kan l'heure de la mort arriver, à ce moment là, Allah dire bane anges aller, et zot prend sa message de la mort et zot vini et zot pas commette aucaine excès, aucaine injustices, zot faire exactement sa ki Allah dire zot.

Ici en fait fine servi le mot *Haqq* ki mo ti pé expliquer. Li pe dire ki lerlà zot tous pou retourne vers sa Maitre ki véridique là. Et l'ordre aussi vine de Li-même. Et Li bien vite pou régler bane comptes.

Maintenant le *Maliki Yaumid Deen* ki lier avec la vérité. Sa liaison là attire nous l'attention lors nous bane actions. Li donne nous l'ordre pou surveille nous bane actions. Li pé dire ki mazine bien ki ou pas capave sauver de Allah Le Suprême. Sa c'est So faveur ki Li laisse So bane les autres décrets en actions et sa continuer protège ou. Mais sa c'est ene zaffaire ki pou durer tout au plus jusqu'à la mort. Kan la mort pou vini, bé li pou vini sous décret d'Allah même. À ce moment là, ou pou bizin présenter devant le Maitre du Jour du Jugement pou être juger avec vérité.

Quran pé bien explique sa sujet là. Allah Li vrai et Li pou décide avec vérité. Li pas pou faire aucaine excès contre n'importe ki sanlà. Li pou juge avec la justice parfait et Li ene Être ki bien vite régler bane comptes. Li donne ou le temps aussi lontan ki ou ena la vie lors la terre mais ene fois ki ou mort, Li pas tarder pou faire le règlement des comptes.

Ensuite Li ene Allah ki ena pouvoir complet, ki suprême. Li émerger comme suprême, comme vérité aussi, et couma mo fine dire ou ki, si ou envie sapper, bé faire la Vérité vine ou Maitre, parski Allah Li la Vérité. *Maula* veut dire camarade,

ene quelqu'un ki sappe ou, ki protège ou. Donc, Allah même dire ki ou ena pou vine kot Moi (Allah la Vérité) et si dans sa le monde là ou pas fine adopter la vérité et ou pas fine établi lien avec la vérité, bé dans lotte lé monde Li pas pou ena aucaine connexion avec ou.

Donc, si ou envie sapper, bé faire la vérité vine ou *Maula*, sinon ou pas pou capave sapper. Bane dimounes ki fine faire mensonge vine zot camarade dans le monde, à l'heure de chaque difficulté zot prend support de mensonge, à l'heure de chaque gourmandise zot prend aide de mensonge, pou gagne chaque désire de éloge zot prend support de mensonge, pou sapper avec chaque règlement de compte zot adopter le mensonge, zot intérieur et extérieur complètement mensonge, et si zot dire ki le jour de *Qiyamat* la vérité pou protège zot, bé sa c'est ene grand mensonge. Et Quran fine donne sa l'exemple là, fine dire ki pou ena bane tel imbéciles ki même le jour du *Qiyamat*, au lieu ki zot vine dans protection Allah, zot pou essaye vine dans protection de mensonges.

Donc, mensonges signifie cause ene causer ki ou conner li pas couma ou pé dire. Ou conner ki ou camarade pas fine faire ene kitchose. Mais ou persister avec connaissance ki li fine faire sa. Alors sa appelle mensonge et celui ki commette sa action-là appelle li menteur. Dans Quran Allah (swt) dire: « **Malédiction Allah lors bane menteurs** ». (Surah Al-Imran 3 : 62).

D'après ene hadith de Tirmizi, mensonge li amène vers *gunnah* (péché) et *gunnah* amène vers l'enfer. À force ene dimoune cause menti ki finalement li être reconnu comme ene grand menteur kot Allah Ta'ala. Mensonge li pas digne à ene ki ena *Imaan* (la foi). C'est ene kitchose de la honte et de la bassesse ki ranne ene dimoune indigne. Donc, cause menti, li pas travail ene dimoune ki ena dignité. Promouvoir et soutenir ene pratique ki en dehors bane limites de *Shariah* aussi li ene mensonge. Et sa li encore pli grave parceki li capave mette toute ene population dans l'erreur. Et parceki sa mensonge là li ene *bouhtaan* (fausse blâme) lors Allah Ta'ala et So Rassool (saws). Sa kalité dimoune là li faire croire céki pas vrai. Li envie faire croire ki c'est l'ordre Allah Ta'ala et l'enseignement de Rassoolullah (saws) mais pourtant li conner ki li pas coumsa. Li faire li juste pou so gain matériel et parfois li faire li pou pas perdi point.

Parfois ene dimoune li arriver cause ene kitchose ki pas vrai. Mais li faire sa par erreur et par confusion. Sa kalité dimoune là li capave ena ene chemin sorti si li

fine prend tous so précaution avant li dire sa. Si jamais li faire li par négligence, alors li pou coupable kot Allah Ta'ala à cause so négligence. À cause sa, bizin prend boucou précaution avant cause *Deen*. Faudré pas déclare conner céki ou pas conner. Ena boucou dimounes dans sa erreur là, li tellement ene zaffaire courant ki ena des fois bane *Uléma* aussi tombe là-dans. Zot mal interprète bane versets Quran et bane hadiths. Et zot induire le public dans l'erreur.

Donc cause causer *Deen* sans connaissance li bien grave et pé commette ene péché lors Allah et So Rassool (saws) kot ou pé dire bane zaffaires ki pas vrai. Bizin mette dans la tête ki tous céki ene dimoune pé envie accumuler et gagner pour embête dimoune li pas représente nannié divant céki Allah Ta'ala fine réserver pou bane ki sincère et honnête. Lors là sa bien tiguitte nannié di tout là, li pou ene bien, bien tiguitte le temps. À cause sa nous bizin cause la vérité, pratique la vérité, reste lors la vérité et propage la vérité si vraiment nous envie vine appréciable dans lizié Allah Ta'ala. Nous manifester So attribut vérité. Allah Li vérité, Li content nous vive nous la vie dans la vérité et pratique la vérité. Pou ena bane grands testes, kan ou pratique la vérité, pou ena tous sorte tentation ki pou tente nous pou pas dire la vérité. Mais nous bizin conner ki nous ena ene prix à payer pou dire la vérité. Ena boucou kitchose nous pou perdi aussi. Mais pou le plaisir d'Allah Ta'ala nous bizin accepter perdi li. Et sa perdition là li pas représente nannié divant céki pé attane nous. Li pas ene perdition dans vide ki pou plonge ou dans le regret. C'est ene perdition à part, ki couronne ou de succès. C'est ene perdition ki ene la grain subir pou donne naissance à ene grand z'arbre charger de fruits.

Donc, mo espéré ki tous bane musulmans et surtout nous bane membres du Jamaat Ul Sahih Al Islam pou réfléchi lors tous sa bane zaffaires ki mo fine expliquer lors Allah (swt) So bane attributs et nous faire nous ene devoir lire banes attributs d'Allah tous les jours, *Insha Allah*. Et *Insha-Allah*, le mois béni de Ramadan pé vini. Ki nous tous, sak musulman en général profite de sa bane jours béni là et tourne zot plisse vers Allah afin pou récolter So plaisir, et nous tout nous faire *duahs* ensam pour ki Allah gagne pitié de l'humanité dans sa bane moments difficiles là et fer le monde revivre dans So *Zikr* (souvenir) et reconnaissance. À l'heure actuelle, officiellement parlant, nous fine dépasse les deux millions de cas positifs de COVID-19 et plisse ki 145,000 morts. Mo termine avec sa verset Quran là : **« Jouissance dans duniya pas représente nannié divant Akhirat aparte ene kitchose bien minime. »** (Surah At-Tauba 9 : 38).